

Pippi Soccalonga nr. 2

■ (cp) Radio e Televisiun Rumantscha (RTR) e la Lia Rumantscha (LR) preschantan in ulteriur disc cumpact (DC) cun las aventuras da Pippi Soccalonga. Il giu auditiv cuntegn ils chapitels 4–6 da las aventuras da Pippi. E sco zutgerin è vegni registrà la chanzun da Pippi per rumantsch cun text da Benedetto Vigne. Suenter che RTR e la LR han preschentà il november passà ils emprims trais chapitels da las aventuras da Pippi, cuntinua uss l'istorgia. «Pippi va a scola», «Pippi raquinta l'istorgia dal Chinois e chatta in zup» e «Pippi organischa ina spassegiada».


Spezialmain per il disc actual è vegnida scritta la chanzun da Pippi Soccalonga per rumantsch. «Duas gia dus èn trais, videvidevit e trais èn quatter, e dal tschiel il blau videvide vi sco'l plascha mai.» Uschia entschaiva la chanzun rumantscha da Pippi. Il text è da *Benedetto Vigne*. Chantadura è *Marietta Jemmi* che gioga er la rolla da la Pippi. La chanzun inclusivamain il text rumantsch sa chattan sin il disc «Top Kids, vol. 5, Pippi Soccalonga».

Pippi Soccalonga fascinescha gia dapi onns uffants sin l'entir mund. Ils films èn daventads claschiers. En il decurs da quest onn

suonda anc in ulteriur DC cun ils davos chapitels da las aventuras da la matta ord la «Villa Babilonia».

L'Astrid Lindgren, ch'ha inventà la figura da la Pippilotta Victualia Rollgardina Menta, figlia dal chapitani Efraim Soccalonga è l'autura svedaisa da cudeschs d'uffants la pli enconuschenta sin l'entir mund. Malgrà ch'ella ha pir entschet cun 37 onns a scriver istorgias, datti pli che 70 cudeschs dad ella e quai en almain era tants linguatgs.

Il disc pon ins pustar tar RTR ubain tar la Lia Rumantscha a Cuir: www.sim-salabim.rtr.ch; www.liarumantscha.ch



Il nov DC da las aventuras da Pippi Soccalonga è sin fiera.